

四庫全書

史部

欽定四庫全書

史部

姑蘇志卷三十五至

詳校官編修_臣曹振鏞

檢討_臣德生覆勘

總校官知縣_臣楊懋珩

校對官中書_臣李 蔡

謄錄監生_臣陳元熙

欽定四庫全書

姑蘇志卷三十五

明 王鏊 撰

吳世家

封爵氏族附

自古君茲土者惟吳最久自泰伯至夫差歷二十
五君其流風遺俗至今人猶道之故歷著焉凡後
之寄爵者亦牽連書之

僭稱者不書

至若孫氏楊氏錢

氏李氏雖亦嘗據有而末為都故不及錄也

泰伯姬姓周太王之子太王三子長泰伯次仲雍次季

歷季歷生聖子昌太王意屬之泰伯知其意與仲雍俱逃荆蠻斷髮文身示不可用太王卒泰伯仲雍歸執喪還葬荆蠻荆蠻之人義而歸之者千餘家乃自號勾吳居數年民人殷富遭殷之末中國數用兵恐及於難泰伯始令人城荆蠻之地耕其中泰伯卒葬於梅里平墟無子仲雍立

仲雍一名吳仲初泰伯既號勾吳吳人或問何象泰伯曰吾以伯長居國絕嗣後當有封者吳仲也勾吳非

其方乎仲雍卒子季簡立季簡卒子叔達立叔達卒
子周章立

周章時武王克殷求泰伯仲雍之後因封周章為吳伯
周章卒子熊遂立熊遂卒子柯相立柯相卒子疆鳩
夷立疆鳩夷卒子餘橋疑吾立餘橋疑吾卒子柯盧
立柯盧卒子周繇立周繇卒子屈羽立屈羽卒子夷
吾立夷吾卒子禽處立禽處卒子轉立轉卒子頗高
立頗高卒子句卑立

吳越春秋周章子熊熊子遂橋
作喬盧作盧轉作專譙周古史

考作柯轉
平作畢

句卑卒子去齊立去齊卒子壽夢立

壽夢立而吳始大稱王壽夢二年楚之亡大夫申公巫
臣適吳教吳射御以其子狐庸為行人導之伐楚蠻
夷屬於楚者吳盡取之乃朝周適楚觀諸侯禮樂會
魯成公于鍾離十六年楚共王伐吳至衡山二十五
年王壽夢卒初壽夢食不二味屋不重席室不崇壇
器不彫鏤宮室不觀舟車不飾衣服財用擇不取費
在國天有菑癘親巡其孤寡而共其乏困在軍熟食

者分而後食其所嘗者卒乘與焉有子四人長曰諸
樊次曰餘祭次曰餘昧次曰季札季札賢壽夢欲立
之季札讓曰禮有制奈何廢前王之禮而行父子之
私乎壽夢乃命諸樊曰我欲傳國及札爾無忘我言
諸樊曰昔太王知西伯之聖廢長立少王道果興今
欲授國於札臣誠願耕於野王曰周之德加於四海
今汝以區區之國荆蠻之鄉奚能成天子業乎惟子
不忘吾言必以次及札諸樊曰敢不如命於是乃立

諸樊攝行事當國

諸樊已除喪讓位季札季札不受棄其室而耕於野乃舍之王諸樊卒弟餘祭立

王餘祭三年齊相慶封來犇封以朱方之縣四年使季札聘於魯觀周樂十年楚靈王會諸侯伐吳之朱方以誅慶封吳亦攻楚取三邑十二年楚復攻吳次于乾谿楚師敗走十七年王餘祭卒弟餘昧立

王餘昧在位四年卒欲授位季札季札遂逃去國人立

餘昧子僚

王僚二年使公子光伐楚戰于長岍吳師敗亡其餘皇

舟

亦作餘艘

光請於衆曰喪先君之乘舟豈惟光之罪衆

亦有焉請襲取之以救死衆許之使長鬣者三人潛
伏於舟側曰我呼餘皇則對師夜從之三呼皆迭對
楚人起戰師亂吳人大敗之取餘皇以歸五年楚之
亡臣伍子胥來奔公子光客之欲與為他謀八年僚
使公子伐楚大敗之迎故太子建母以歸九年使光

伐楚初楚邊邑卑梁之氏處女

吳越春秋作脾梁

與吳邊邑

女爭桑兩國邊邑長相攻吳不勝至是伐楚取二都

十三年吳使掩餘燭庸

吳越春秋掩作蓋庸作庸

圍楚使季札於

晉以觀諸侯之變楚發兵絕吳後吳兵不得還初光
以僚之立不悅曰先君不與子而與弟者凡為季子
也不從先君之命而與子我宜立者也僚焉得為君
哉至是光心動謀之轉設諸轉設諸曰僚可殺也母
老子弱弟絕於楚內無骨鯁之臣光從之伏甲於窟

室

窟左傳作堀吳越春秋作室

請王僚飲酒僚入專設諸置魚腸

劍炙魚中進之遂刺王僚貫甲達背僚死光自立是

為闔閭

闔閭即位始任賢能施恩惠以仁義聞於諸侯舉伍子

胥為行人與謀國政闔閭問計於子胥子胥言安君

治民要在於立城郭設守備實倉廩治兵庫王乃委

計於子胥元年伯嚭來奔王問子胥伯嚭曰吾欲出

兵何如皆對曰臣願用命吳王內計二子皆怨楚深

恐以兵往破滅而已登臺向南風而嘯有頃而嘆群臣莫有曉者子胥深知王意之不定乃薦孫武而用之二年闔閭使徐人執掩餘鍾吾人執燭庸二公子奔楚吳子執鍾吾子遂伐徐滅之三年吳侵楚伐夷侵潛六圍弦始用伍員之謀五年吳伐越敗之六年楚攻吳吳迎擊之大敗于豫章取楚之居巢獲楚公子繁以歸九年王謂子胥孫武曰始子言郢未可入今何如二子對曰唐蔡怨楚必得唐蔡乃可冬蔡侯

吳子唐侯伐楚自豫章與楚夾漢三戰十一月庚午
二師陳于柏舉闔閭之弟夫槩以計破之敗諸雍澶
五戰及郢楚昭王出奔吳師入郢十年春越聞吳王
之在郢以兵入吳夫槩亡歸吳自立闔閭歸攻夫槩
夫槩奔楚楚封於堂谿十九年吳伐越越子勾踐敗
吳師于攜李闔閭傷指將死使人立太子夫差謂曰
爾使人立於庭出入必謂已曰爾忘勾踐之殺汝父
乎則對曰不敢三年乃報越

夫差元年以伯嚭為太宰二年王悉精兵以伐越敗越於夫椒遂入越越王勾踐以甲五千棲於會稽使大夫種因太宰嚭以行成吳王將許之伍員諫不聽退而告人曰越十年生聚十年教訓二十年之外吳其為沼乎越及吳平五年會魯哀公于鄆徵百牢欲霸中國也六年吳城邗通江淮七年子貢說吳王伐齊又說越王勾踐佐兵以徼吳而連魯以制吳敝吳王從之伍員諫不聽遂會魯哀公伐齊十一年復伐齊

越王勾踐率其衆以朝厚獻遺之吳王喜唯子胥懼
曰是豢吳也諫王不聽以伍員使齊員屬其子於齊
鮑氏因還報吳王王大怒賜屬鏤之劍以死十三年
召魯衛之君會于橐皋十四年北會諸侯于黃池越
伐吳虜太子友遂入吳吳人告敗于王王惡其聞也
斬七人於幕下於是與晉定公爭長吳人曰於周室
我為長晉人曰於姬姓我為伯趙鞅怒將伐吳乃長
晉吳王歸與越平十八年越遂圍吳二十三年越王

勾踐欲遷吳王于甬東王辭曰孤老矣焉能事君乃
縊吳國遂亡

封爵

劉濞漢高帝兄子

事見平
亂條

曹彪魏太祖子黃初三年封

司馬晏晉武帝子太康十年封敬王食吳丹陽吳興三
郡謚曰敬

晉康帝歲咸和元年以皇子封九年改封瑯琊猶食吳

郡

齊明帝鸞永元元年廢封

蕭岑梁宣帝子

後魏可博真南安王余俱太武帝子

杜伏威唐武德二年封

李元軌唐高祖子武德六年封

李元璿武德七年封

李恪太宗子貞觀十年封

李榮蔡王位下

李宙見柳宗元文未詳所出

趙元傑宋太宗第五子淳化五年封

趙宗絳太宗曾孫熙寧中嗣封吳國公進爵為王

趙顥英宗長子卒追封

趙昺神宗第九子卒追封

吳近高宗憲聖慈烈皇后之父以后貴追封

右吳王

長孫陵後魏封

東魏孝靜帝善見梁朝以蘭陵公封

陳藩陳後主第十子禎明三年封

右吳郡王

言偃唐開元中追封吳侯宋咸平三年封吳公

右吳公

尉遲綱後周武成元年追封謚武

馮盎唐武德中封

尉遲恭武德五年封

李孝逸唐宗室光宅元年

李膺吳王祗弟

李保玄宗孫

武行德宋乾德元年封

侯童乾德五年封

苗繼宗女為仁宗貴妃

趙樞徽宗第五子崇寧二年以皇子封

趙植徽宗第十二子大觀中累封

趙璩藝祖七世孫高宗朝命不果行又封崇國

林希

右吳國公

陸宸唐光化三年封食邑一千五百戶

陸佃宋封

右吳郡國

鄧泛漢光武封

孫策建安三年封

孫紹策子吳黃龍元年封

孫英登次子

孫基魯王霸子五鳳中封

孫壹仕魏封

右吳侯

魏憲宋紹興中封

范成大淳熙十六年封

胡元質

王埜寶祐二年封

右吳郡侯

陸遜漢建安二十四年封

張昭吳黃龍元年封邑萬戶子休嗣

右婁王

庾冰晉咸和中封

右吳縣侯

黃由宋封

右長洲縣子

范之柔嘉定八年封加食邑三百戶

右崑山縣子

陸長源唐封

右吳郡男

陸元朗高宗朝封

顧少連

陸兼物

張鑑

張聿

鄭作肅宋食邑三百戶

糜弇

右吳縣男

顏度宋封

鄭起潛宋食邑三百戶

王景齊食邑三百戶

右長洲縣男

衛涇

鄭準

鄭竦

右崑山縣男

氏族

朱氏

千姓編云朱高陽之後周封于邾後為楚所滅子孫
乃去邑氏朱望出沛國又吳郡或曰朱氏盛大者有
九族吳郡居其一今郡之穹窿山有朱氏墓碣字已
漫滅其可讀者云一十六世四百二十九年居下邳
自平始三年避地至會昌壬戌凡八百四十二年籍
于吳此唐時子孫追叙其先過江歲月也

張氏

白氏文云漢侍中張肱避地渡江始居於吳故其子

孫稱吳郡人晉丞相嘉以孝弟聞于郡故其所居號
孝張里元和姓纂云吳郡張氏本出嵩第四子睦字
選公後漢蜀郡太守始居吳郡裔孫顯齊廬江太守
紹梁零陵太守

顧氏

本越王勾踐七代孫封於顧余

顧城在濮州范陽

漢初居會

稽以邑為氏韋夏卿撰顧少連碑謂顧氏復徙吳會
自晉司空和洎梁給事中耀至少連十三代矣世說

敘錄有顧氏譜甚詳姓苑云吳郡顧氏漢有荊州刺史顧容又晉有固秉亦有故姓

陸氏

媯姓田敬仲之後也十一世齊宣王少子通封於平原般縣陸鄉即陸終氏之故地因以為氏通謚元侯生恭侯發為齊上大夫生二子曰萬曰皋孫賈為漢大中大夫萬生烈為吳令死葬胥屏亭子孫遂為吳縣人十世孫潁川太守閔生三子曰邠曰溫曰威號

潁川枝威生揚州別駕續文生三子曰稠曰逢曰寢
稠為荊州刺史號荊州枝稠生二子曰肅曰謙肅為
丹徒令號丹徒枝世說叙錄有陸氏譜陸景獻自有
吳郡陸氏宗系譜一卷

暨氏

暨姓出吳郡元祐間唱名有暨濤時作洎濤呼不應
刑部侍郎蘇頌以結呼之即應三國志有暨豔乃吳
人既而問之果平江人

歸氏

左傳胡子國姓歸為楚所滅子孫或以國為氏或以
姓為氏以姓為氏者世居吳郡

壽氏

吳王壽夢之後吳大夫壽越又有壽於姚今吳中尚
有此氏

賞氏

姓苑云賞氏吳中八族也晉有賞慶為都鑒主簿

兒氏

吳郡有語兒生而能語子孫氏焉

姚氏

舜生於姚墟故因生以為姓王莽亂舜後子恢過江
居吳郡改姓媯氏

虞氏

武王封仲雍之後於虞城晉滅虞子孫以國為氏

吳氏

本勾吳國越滅吳子孫以國為氏

孫氏

姬姓衛武丁之後孫耳食邑於威生武仲亦曰孫仲
以王父字為氏齊孫武奔吳為將武之子明食邑於
富春自是世為吳人

諸氏

音遮

後漢洛陽令諸施吳郡人今吳郡有此氏

與氏

音胥又音滑

望出吳郡見姓苑

言氏

孔子弟子言偃吳人今後裔多居常熟

帛氏

姓苑云吳郡人漢五威將軍帛敞後漢有帛宣神僊
傳有帛和晉有高僧帛道全

笮氏

側迫切
亦作逌

風俗通楚有笮倫今吳郡有此姓吳志漢中有笮融

居丹陽

岑氏

諱暄字公孝黨錮難起逃于江夏山中徙居郡生亮

亮生伯伯生軻為吳郡會稽鄱陽太守

唐書姓系表

閻氏

姬姓武王封泰伯曾孫仲奕於閻鄉因以為氏又云
王少子生而有文在手曰閻康王封於閻城今蘇州
有閻橋

麴氏

本鞠氏也周人漢尚書鞠譚子悶避難改為麴唐有
麴信陵吳郡人居洞庭

湯氏

宋有道人湯惠休正元道人湯靈澈宋州刺史湯柔

並吳
人

崇氏

商時侯國也周文王滅之子孫以國為氏唐開元登

科有崇穎宋朝登進士第有崇大年皆吳郡人

沃氏

商王沃丁之後神僊傳有沃焦吳人

胥門氏

左傳吳大夫胥門巢巢居吳門胥以所居為號其後
遂為氏今作胥氏

角里氏

漢初商山四皓有角里先生者本與周同姓名術泰

伯之後在洞庭西山居故以自號子孫遂以為氏或作角氏後漢有角若叔者乃其後也

冷氏

即伶氏風俗通云黃帝時典樂伶倫之後今多作上音唐貞元中監察御史冷朝陽吳人

是氏

是儀鬻書衣判是儀無首族變勾吳三國志是儀本

姓氏孔融嘲儀氏字民無上故改為是

文苑
聯珠

錢氏

彭祖裔孫孚為周錢府上士因官命氏子孫多居下
邳漢哀平間錢遜避王莽亂徙居吳之烏程五代時
廣陵王元璪為中吳軍節度使卒葬吳下子孫因家
焉

范氏

陶唐之苗裔周宣王殺杜伯其子隰叔奔吳為范氏
越有范蠡滅吳辭越居洞庭之東山唐又有范隋為

麗水縣丞屬時亂遂家吳地子孫遂為吳人即文正公之高祖也

富氏

世家京洛嘉祐中富嚴守蘇州善吳中風物之美因居不去子孫遂為吳郡人

章氏

本出姜姓太公望之後封於鄆子孫以邑為氏後去邑作章嘉祐中浦城章深為蘇州教官就居於此故

有南北二族棠居城北號北章惇居城南號南章其二氏甚盛

傅氏

廣韻餘字下註云傅餘氏本自傅說既為相其後有留於傅巖者因號傅餘氏秦亂自清河入吳漢興還本郡餘不還者傅氏今吳郡有之

吳之著姓凡三十餘自漢以來朱張顧陸望於郡故有朱文張武陸忠顧厚之目又云虞魏顧陸吳

之舊姓或云虞魏之昆顧陸之裔岐嶷繼體老成
奕世陸士衡云八族未侈四姓實名家文德熙
淳懿武功侔山河正謂此也

姑蘇志卷三十五

欽定四庫全書

姑蘇志卷三十六

明 王鏊 撰

平亂

蘇為東南樂土自秦以來或有乘時跳梁倡變
階禍而皆敗不旋踵豈亦地勢使然乎今考諸史
質諸舊聞書之冊亂臣賊子可以戒矣

秦二世元年會稽假守殷通素賢項梁召與計事梁曰
方今江西皆反此天亡秦時也先發制人後發制於

人守歎曰聞夫子楚將世家唯足下耳梁曰吳有奇士桓楚亡在澤中獨籍知之梁乃戒籍持劍居外待梁後入語守曰請召籍使受令召桓楚籍入梁賄籍曰可矣籍遂拔劍擊斬守梁持守頭佩其印綬門下驚擾籍所擊殺數十百人府中皆讐伏莫敢復起梁乃召故人所知豪吏諭以所為遂舉吳中兵収下縣得精兵八千人梁為會稽將籍為裨將徇下縣度江而西擊秦

劉濞漢高祖兄仲之子高帝十三年以從破黥布功封吳王王三郡五十三城已拜受印高祖相之曰若狀有反相獨悔業已拜因拊其背曰漢後五十年東南有亂豈若邪然天下同姓一家慎無反濞頓首曰不敢至文帝時濞子入侍皇太子博爭道不恭太子引博局提殺之濞稱疾不朝始有反謀帝賜以几杖謀乃解然其居國以銅鹽故百姓無賦他地來捕亡者公弗予如此四十餘年以是能使其衆景帝三年晁

錯議削郡漚遂反上以周亞夫為將軍討之漚戰敗走丹徒東越人殺之

晉咸和二年以庾冰為吳國內史將兵備蘇峻峻反三吳欲起義兵庾亮不聽以虞潭督三吳諸郡軍事三年峻破臺城遣兵攻庾冰冰不能禦棄郡奔會稽峻購之急吳鈴下卒引冰入船載去冰僅免

詳宦蹟條

峻以

蔡謨為吳國內史司徒導與張闓謀密令以太后詔諭三吳吏士使起義兵會稽內史王舒以庾冰行奮

武將軍將兵一萬西渡浙江時郡人顧衆為義興太守還吳潛圖義舉將軍張慙為峻收兵於吳衆遣人諭慙慙從之衆遣人告謨曰衆已潛合家兵待時而奮乃檄衆為本國督護衆從弟颺為前鋒督護吳中人士同時響合遂與虞潭皆起應冰張闓遣吳郡度支運四部穀以給軍峻遣其將弘徽鼓行而前衆與颺慙要擊于高茆大破之謨以庾冰還任便去郡遣颺率諸軍屯無錫衆恐賊從海虞道入自往備之賊

帥張健馬流攻無錫颺等大敗冰亦失守健等遂據
吳城管商焚吳縣虞潭遣將拒之亦敗衆自海虞由
婁縣東倉與賊戰破之義軍又集進屯烏苞王舒虞
潭并檄衆為五郡大督護潭前鋒戰沒衆還守紫壁
或勸衆過浙江衆不從合諸軍復進健留錢弘為吳
令退于曲阿衆至路丘斬弘進處吳城遣督護朱祚
等九軍攻賊大破之峻敗後其將劉徵帥衆數千浮
海入婁縣詔以希鑒都督諸軍事討平之九月峻伏

誅

桓玄太元末補義興太守鬱鬱不得志嘗登高望震澤
歎曰父為九州伯兒為五湖長棄官歸國後遂謀反
伏誅

隆安三年會稽世子元顯發東土諸郡免奴為客者置
京師以充兵役東土囂然孫恩因民心騷動遂反旬
日間衆數十萬時三吳承平日久民不習戰郡縣兵
皆望風奔潰恩據會稽自稱征東將軍時內外乖異

朝制所行三吳而已及恩作亂八郡皆為恩有詔徐州刺史謝琰及加劉牢之都督吳郡諸軍事牢之引劉裕為參軍共討之恩驅男女二十餘萬逃入海以琰為會稽太守都督五郡軍事咸海浦四年五月恩復入會稽琰敗死十一月吳國內史袁山松築滬瀆壘以備之五年五月恩陷滬瀆殺山松元興元年三月臨海太守辛景擊破之恩所虜三吳男女死亾殆盡乃赴海死

隆安初王廕以母喪居吳王恭反版廕建武將軍吳國
內史令起軍為聲援廕即墨縑合衆誅殺異已仍遣
前吳國內史虞嘯父入吳興義興聚兵赴者萬計會
恭敗廕更遣其子泰伐恭恭遣劉牢之擊泰斬之又
與廕戰于曲阿衆潰廕單騎走不知所在廕導之孫
也

齊永泰元年帝疑會稽太守王敬則反側以張瓌為吳
郡太守置兵佐密防之中外傳言當有異處分敬則

遂反帥實甲萬人過浙江瓌遣兵三千拒之於松江
聞敬則金鼓聲一時散走瓌逃匿民間敬則以舊將
舉事百姓擔篙荷鍤隨之者十餘萬衆至晉陵前軍
司馬左興盛輔國將軍劉山陽築壘於丹陽禦之敬
則戰敗斬首傳建康

梁太清三年侯景亂遣子子悅等將羸兵數百東略吳
郡新城戍主戴僧遇說太守袁君正閉關拒守君正
素怯郊迎之子悅執君正掠奪財貨子女東人皆立

堡拒之九月景使侯子鑒入吳郡以庠公蘇單于為
太守遂寇吳興或勸吳興守張嵯效君正迎降嵯曰
袁氏世濟忠貞不意君正一旦隳之吾豈不知此難
久全但以身許國有死無貳耳子鑒執送建康殺之
時景所據惟吳郡以西南陵以北而已吳盜陸緝等
起兵襲郡殺蘇單于推前淮南太守文成侯寧為主
承聖元年三月王僧辯陳霸先敗景於石頭景東走
欲就謝答仁於吳至晉陵得餘兵因驅掠居民東趨

吳郡四月侯瑱追及於松江擊敗之景與數十人單舸走推墮二子於水將入海其都督羊鯤殺之送屍建康傳首江陵截其手送于齊

陳吳州刺史蕭瑛能得物情三吳父老曰吾君之子也陳亡吳人推為主與蕭巖同據東吳之地隋使宇文述討之瑛立柵於晉陵城東留兵拒述遣其將王褒守吳州自義興入太湖欲掩述後述進破其柵迴兵擊瑛大破之又遣兵別道襲吳州褒衣道士服棄城

走獻以餘衆保包山隋將燕榮擊破之獻匿民家為人所執送長安斬之

隋大業九年劉元進舉兵應楊玄感將渡江而玄感敗吳郡朱變晉陵管崇亦舉兵共迎元進據吳郡稱天子署置百官衆至十萬變本還俗道人涉獵經史微知兵略時為崑山博士知天下將亂謀於學而起兵民苦役者赴之如歸自東陽至京口千餘里並受變節度崇隱居常熟身長七尺三寸美姿容少無賴衆

推奉之隋將吐萬緒進軍逼之相持百餘日元進潰遁與崇變連營自保緒復破之斬崇然從亂者益衆帝令江都丞王世充發淮南兵擊之元進崇敗死餘衆降散世充召降者於通玄寺瑞像前范志作通聖寺焚香誓不誅殺散者聞之一旬之間歸首略盡世充貪而無信利在子女資貨悉坑之於黃山下死者三萬餘人由是餘黨復相聚為盜官軍不能討以迄隋亡

大業九年杜伏威起兵掠江淮唐武德二年伏威降唐

唐以為和州總管三年李子通渡江攻沈法興法興
棄毗陵犇吳郡於是丹陽毗陵等郡皆降于子通伏
威遣輔公祐攻子通子通大敗伏威徙居丹陽子通
復東走太湖收合亡散得二萬人襲法興於吳郡大
破之法興棄城走吳郡賊帥聞人遂安遣其將葉孝
辯迎之法興中途而悔欲殺孝辯更向會稽孝辯覺
之法興窘迫赴江死子通軍勢復振徙都餘杭盡收
法興之地自太湖以南皆有之是歲唐封伏威為吳

王四年十一月伏威將王雄誕擊子通子通降聞人
遂安據崑山無所屬伏威使雄誕擊之以崑山險隘
難以力勝乃單騎造其城下陳國威靈示以禍福遂
安感悅出降於是伏威盡有江東之地秋七月子通
復叛欲至江東收舊兵被獲伏誅

唐上元元年劉展反江淮都統李峘自潤州犇宣城副
使李藏用曰以數十州之兵食三江五湖之險固不
發一矢而棄之非勇也收散卒得七百人東至蘇州

募壯士得三千人立柵以拒展與展將張景超孫待
封戰於郁墅兵敗景超遂據蘇州展以其將楊持璧
為蘇州刺史明年展敗死其驍將王晁引兵東走至
常熟而降張景超逃入海餘黨悉平

永貞二年李錡跋扈於浙西朝廷以杜兼為蘇州刺史
兼辭行上書稱錡且反必奏族臣上然之留為吏部
郎中元和二年錡果反先是以其腹心為所部五州
鎮將各有兵數千伺察刺史動靜至是使各殺其刺

史於是蘇州刺史李素為姚志安所敗生致於錡具
桎梏釘於船舷未及京口會錡敗乃免十一月錡伏
誅

乾符二年浙西狼山鎮遏使王郢有戰功節度賞以職
名而不給衣糧郢論訴不獲遂劫庫兵作亂行收黨
衆近萬人攻陷蘇常轉掠二浙後為劉巨容所殺

光啓初劇賊剽崑山招討使周寶遣將張郁戍海上郁
叛刺史五蘊不設備郁遂大掠蘊嬰城以守寶遣兵

討郁郁保常熟遂走海陵

光啓二年十月感化牙將張雄得罪於節度時溥聚衆
三百度江襲蘇州據之自稱刺史聚兵至五萬戰艦
千餘自號天成軍鎮海節度使周寶聞淮南六合鎮
遏使徐約兵精誘之使擊蘇州三年四月約逐張雄
雄入海往據上元文德元年九月錢鏐遣弟鉞攻約龍
紀元年三月拔之約亡入海追殺之鉞以海昌都將
沈粲權知蘇州十月詔以給事中杜儒休為刺史鏐

不悅自署沈祭為制置指揮使大順元年八月儒休
到官鏐使祭害之會淮南將李友拔蘇州祭歸杭州
鏐欲委以罪而殺之祭乃奔孫儒閏月孫儒遣劉建
鋒圍蘇州十二月拔之殺李友仍使祭守州二年十
二月孫儒焚掠蘇常遣兵逼宣州錢鏐復據蘇州景
福元年鏐以鉢為蘇州招緝使乾寧二年九月鏐伐
董昌昌求救於楊行密行密遣泗州防禦使臺濛攻
蘇州以救昌未幾行密將柯厚破蘇州水寨三年四

月淮南兵與鎮海兵

鎮海即錢氏兵

戰于黃天蕩鎮海兵不

利行密遂圍蘇州五月常熟鎮使陸郢以州城應行
密虜刺史成及歸鏐聞蘇州陷急召顧全武使趨西
陵備行密全武請先取越州後復蘇州鏐從之光化
元年九月顧全武攻蘇州城中及援兵食皆盡淮南
所署刺史臺濛棄城走援兵亦遁全武克城追敗周
本等于望亭獨秦裴守崑山不下全武率萬餘人攻
之裴屢出戰使病者被甲執矛壯者設弓弩全武每

為之卻檄裴令降全武嘗為僧裴封函納款全武喜
召諸將發函乃佛經一卷全武大慚曰裴不憂死何
暇戲人益兵攻城引水灌之城壞食盡裴乃降錢鏐
設千人饌以待之乃出羸兵不滿百人鏐怒曰單弱
如此何敢久為旅拒對曰裴義不負楊公今力屈而
降耳非心降也鏐善其言全武亦勸宥之鏐從焉閏
月鏐以其將曹圭為蘇州制置使

范志作乾
寧五年誤

梁開平

二年八月淮南遣周本呂師造擊吳越九月圍蘇州三

年四月鏐遣其弟牙內指揮使鏐及弟鋸與行軍副

使

范志作江海遊奕都虞候

杜建徽等救之城中將臨海孫琰號

孫百計專製守禦之具淮人以洞屋攻城琰設高竿竿上著大輪盤載大鐵渴烏引半繩運出城外而反其洞屋鼓噪而揭去之賊兵盡露因加矢石淮人退舍尋復縱巨石擊城聲如雷城中大懼琰乃盡取公私繩結網用巨木張之蔽于城屋石之墜者悉着網中賊計遂沮有水通城中淮人張網綴鈴懸水中魚

鼉過皆知之吳越都虞候司馬福潛水入城以竿觸網敵聞鈴聲舉網福因得過居水中三日乃得入城復出由是城中號令與援兵相應敵以為神鏐嘗遊府園見園卒陸仁章樹藝有智而志之及蘇州被圍使仁章通信入城果得報而返吳越兵內外合擊淮南兵大敗擒其將何朗閭丘直等三千餘人獲兵甲生口三十萬奪戰艦二百艘周本夜遁又追敗之於黃天蕩鍾泰章將精兵二百為殿多樹旗幟於菰蔣

中追兵乃不敢進而還真明四年吳遣陳璋為東南面應援招討使將兵侵蘇湖已而悉平

宋建炎三年金人陷維揚高宗南渡二月丙辰至平江富民或私遁而市井貿易如故上至府治去介冑易

黃袍儀衛稍增遂下詔

詔曰朕以單微之質蒙世大難賴臣庶共戴獲承祖宗之

餘念必宅中經遠均布惠澤以慰萬邦歸往之心故雖外迫於敵兵誓不遽離於近甸省刑薄歛撫士與民不以一毫擾郡邑行再朞矣輸誠盡禮遣使相望而敵未寢兵還將練師朝夕從事而力不逮志自間長驅之謀者請適東南遠險之地以保朕躬朕寧不免於敵蓋不忍先自苟生棄我西北之人而遽遠也

故出兩道之師外為蔽援而嗣遣將命之臣祈保赤
子以待敵之易慮則共圖康居日可計矣人力雖殫
天道難度大名東平相繼陷失始命官吏民庶絕江
自便朕猶遷延不先俟天人之我相也逮敵輕騎潛
行不日遽至朕與近臣始挺身東行由江浙為暫避
之計凡乘輿服御帑藏之積一切棄捐二三大臣保
其家室念雖顛沛至是而不負於中原西北之人朕
心猶庶幾焉與其謀已忘民及患而去則不得已而
後動不猶愈乎但聞官吏軍民雖有自便之詔多不
及避生計蕩然或不得與其家皆來痛切朕心負罪
何極自昔帝王脫身於皇遽之時而立國於顛沛之
後失勢於屢挫之辱而戡難於一勝之功者尚多有
之夫良農不為水旱輟其耕志士不為貧窮怠其道
朕能勞形克己圖保生民而不能使吾民之遽安能
側身修行圖格天心而不能保天心之必相尚賴士
夫暨爾萬方有衆戮力一心式孚於帝庶遠成績歲

保康又朕誠切
至宜察朕心

駐駕三日始起留右丞相朱勝非侍

郎張浚彈壓平江晚次吳江縣遂幸臨安

故老云高宗初幸泊

舟閭門外侍衛取民家白木橈坐岸許以待馬至及行就攜以去蓋已經御不欲留民間也

建炎四年二月金烏珠自明越還二十五日犯平江五

漏未盡四刻兵自盤門入劫掠官府民居子女金帛

廩庫縱火延燒煙焰見二百里凡五晝夜至三月朔

始出閭門士民得脫者十二三而遷避不及遭殺者

十六七先是高宗駐蹕郡中人情倚以為安九月移

會稽人皆失望詔以工部侍郎湯東野為守同知樞
密院周望為淮浙宣撫使將官陳思恭巨師古張俊
魯珪李貴等悉隸望節制望遣諸將各部所隸兵分
護境內時河內降賊郭仲威領萬衆至自通州屯虎
丘山未幾聞建康失守高宗幸四明於是平江大震
周望與郡守集耆艾士夫問計且曰今戰守皆無策
矣蓋其意在迎降而欲衆發其端士民不容望慮諸
將抗敵取怒歛其兵歸城中而金人乃經廣德取道

南犯四明以窺行在望自謂敵不敢犯境始少安且
倚郭仲威為腹心張俊魯珪居城中巨師古控扼吳
江李閻羅屯常熟陳思恭屯楞伽山兵無紀律村落
間皆被其害而仲威既居城中外為忠勇之論士民
亦信仗之郊居者往往復入城人人以謂四圍渠塹
深廣庫廩充牣兵器犀利無不自安傳者多云敵至
越州返金陵或又謂自臨安道宣歙趨當塗而歸望
等素不嚴斥堠四境無衛明年正月方遣張俊陳思

恭等統兵規入杭州以邀收復之功俊等行涉旬潛
軍于烏墩以觀變二月十八日始馳報金人犯崇德
十九日徵鄉兵發太湖洞庭東西兩山千艘命角頭
巡檢湯舉總之陣于簡村二十一日金人犯吳江巨
師古兵不戰而潰更以太湖民舟為向導歸于西山
二十二日郭仲威遣千兵拒守于尹山已而退師二
十三日府中令民逐便出城留少壯登埤以守是日
遊騎掠城東仲威不戰而返湯東野出奔周望以郡

印付仲威二十四日仲威會諸將飲城上士民數萬
叩頭出血請加守禦仲威奮髯語曰即發騎兵敵行
破矣民慎無擾人猶信之日欲捕金人大集城下仲
威及魯珏兵火廣化寺及醫官李世康宅望與仲威
等皆宵遁其下自城南轉刼居民北出齊門而去民
之得出郭者多為所害金人遂進據城中縱兵焚掠
死者甚衆一城殆空諸將奔伏外邑覘金人去競以
兵還三月二日張俊至自崑山三日師古至自洞庭

李閻羅魯珏郭仲威等至自常熟五日陳思恭至自
烏墩仲威揭榜于市曰本軍已逐退金人收復城府
十五日有詔周望等失守平江可發遣諸將兵往常
州以北衝襲金人以功贖過初金人燒劫之餘又值
仲威縱兵晝夜搜挾民有訪舊居者即執之窮問瘞
藏之物民益冤憤是夏疫米斗錢五百有自敵中
逃歸者多困饑或驟得食而死橫屍枕藉道路涇港
不可勝計哭聲振天地自昔喪亂未有如是之酷者

也郭仲威者出於寇盜號郭大力自茶毒平江之後
為真揚鎮撫使在郡復不悅劉光世為淮浙宣撫
置司京口遣其將王德擒至麾下縛
送行在詔斬於平江市以謝百姓

紹興元年冬盜邵青聚其黨於崇明沙上劉光世令王
德討之拔柵以入青軍大潰餘黨復至諜言青將用
火牛德笑曰此古法也可一不可再命合軍持滿陳
始交萬矢齊發牛皆返奔賊衆殲青自縛請命德獻
之行在餘黨悉平

紹興三十一年駕幸建康撫師十二月壬子至平江泊

姑蘇館葉義問自建康楊存中自鎮江還皆入見守
臣洪遵獻洞庭柑卻不受自是所過無入獻者遵言
官拘舟船聚邊海縣募水手留民兵夾運河築烽臺
徒費無益乃罷鎮江至臨安所置烽燧癸丑上乘馬
入行宮進膳時御營宿衛使司右軍統制苗定以所
部至詔以定兼權主管行在殿前司職事是日武經
郎曹洋自李寶軍中部所獲叛人倪詢應簡至行在
就御舟引見詔礮于市詢常熟人簡道州人並為金

人造舟者也甲寅上次無錫吳芾言知崑山縣胡庭傑應辦巡幸科擾民戶銀器至多詔勒停永不與親民差遣

陳宜中之誅韓震也其部曲李世明挈妻孥士卒逃至平望殺巡檢縱兵火殺略由小長橋透出許市時潛說友守郡不能捕遂入太湖由宜興至建康降於元其軍初在江下殺人甚多殿司兵在吳江亦不能敵多為擁入江水死者甚衆

德祐乙亥三月元師破常州前鋒至閭門有投北人韓
全持元詔招諭郡守潛說友開門納之俾之入見乃
遣兩倅胡玉林鏜出勞其頭目復入至郡與約定撒
花獻納降表為銀三千兩庫銀不足以提舉茶鹽司
鹽倉法數銀足之送至楓橋寺適張世傑提兵抵郡
元軍遂遁去說友祕其事而殺韓全等時人為沁園
春詞以譏之事聞以戴覺民代之

祥興二年元巴延先鋒兵至吳是日大寒雨雪承天寺

僧令行童出覘兵勢行童遠望有以銀椅中坐于山
門者手招行童童畏縮莫敢前其人令軍士趣召之
既至戒以無恐乃問住持某僧與西廊首座某安否
俾童入導意少時自入僧房復詣方丈作禮笑曰二
上人久不會是真忘我耶某即昔時賣卜號知命子
者今為左宣慰矣命煮粥啗其兵且使行童齋招安
榜以吳語誦之曉諭百姓始知其為探謀在江南凡
八年而歸以龍虎山張天師符籙取驗於世祖云

張士誠泰州白駒場人第九四與弟士義士德

第六

九士

信並駕鹽綱船兼業私販初無異志先是黃河變遷至正十一年役民十五萬軍二萬治河民不聊生四方兵起有王克柔亦泰州人家富多結游俠將為不軌高郵知府李齊收捕于獄李華甫與麴張四素感克柔恩謀劫獄齊置克柔于揚州招華甫為泰州判四為千夫長十三年五月士誠又與華甫同謀起事未幾士誠與其徒十八人殺華甫併其衆焚掠村落

驅民為盜陷通泰高郵自號誠王改元天祐設官分
截要衝南北梗塞元立淮南行省於揚州以扼其勢
既而亦招安之立義兵元帥府以官其黨然士誠狙
詐百出卒不就降竟殺李齊十五年五月攻破揚州
殺行省參政趙璉士義被獲伏誅士誠退還高郵九
月又攻破揚州適湖廣行省右丞阿勒呼木引苗軍來
乃復退丞相托克托總大軍臨之號百萬旌旗輜重首
尾千里以為高郵刻日可平然托克托專權久師出遂

有議其後者詔安置淮安路別選相臣統其兵詔未
下時部將董搏霄每為言天兵南下勢如破竹今老
師費財何面目歸報天子不若先攻其易托克從之
分兵破天長六合賊皆潰散所殺者悉良民及攻高
郵墮其外城城中震恐自分亡在旦夕忽聞詔解其
權勇氣百倍出城拒敵諸衛鐵甲軍負不平者盡散
去或相聚為盜江陰群寇互相吞啖江宗三朱英分
黨戕殺宗三將殺英時英就招安為判官州僚無如

之何申白江浙行省云英謀反省差元帥觀孫壓境
觀孫利其賂逗遛不進英乘間逸去過江求救於士
誠仍質妻子借兵復讎士誠初亦疑惑弗聽英盛陳
江南土地之廣錢穀子女玉帛之富以動之於是先
遣士德率高郵賊衆擊橫冊渡鎬山十六年正月朔
攻破常熟江南自兵興以來官軍死鋒鎬郡縣薦罹
饑饉鄉村農夫離父母妻子投充壯丁生不習兵而
驅之死地以故烏合瓦解卒無成功行省丞相達實

特穆爾得便宜行事陞漕運萬戶托音為參政統官
軍民義捍禦境上平江達魯噶齊祿實病死陞松江
府達魯噶齊哈斯實克補之領兵出戰除都水庸田使
貢師泰為平江總管巡守城池吳江止有元帥王與
敬官軍一戰而敗死者過半殘兵千餘欲走入城城
中閉門不納退屯嘉興旋抵松江士誠賊衆纔三四
千人長驅而前直造北門弓不發矢明日緣城而上
遂據有平江路二月壬子朔也劫掠姦殺慘不忍言

脫脫因匿俞家園自刎不死游兵殺之哈沙珊在境外
聞城破自溺死崑山嘉定宗明州人相繼來降維楊
蘇昌齡先避亂居郡士德用為參謀稱曰蘇學士毀
承天寺佛像為王宮易平江路為隆平郡立省院六
部百司凡寺觀菴院豪門巨室將士分奪而居無虛
者幾月進攻嘉興全軍覆沒與敬據松江判以城降
之常州黃貴甫間道歸士誠許為內應遂不戰而破
易為毗陵郡分兵入湖州一鼓而得易為吳興郡署

周仁為隆平太守仁家本鍛工稍習吏事性資深刻
與士德同心僇力躬親細故三月癸巳士誠來自高
郵服御器用皆假乘輿改至正十六年為天祐三年
國號大周厯曰明時設學士員開弘文館以陰陽術
人李行素為丞相弟士德為平章提調各郡兵馬蔣
輝為右丞居內省理庶務潘元明為左丞鎮吳興史
文炳為樞密院同知鎮松江郡州縣正官郡稱太守
州稱通守縣仍曰尹郡同知稱府丞知事曰從事餘

則損益而已欲南取嘉興參政譔勒哲統苗獠猥
名曰達爾罕守禦甚堅屢攻不克秋八月文炳大舉
兵臨其東門悉為所殲文炳僅以身免士德又與
敬提兵入杭州軍氣甚銳杭州大軍歛鋒不敵丞相
退避蕭山士德軍檢括虜掠隆普營萬戶普賢努乃
慶元路萬戶全羅里之子年未弱冠智勇過人率兵
先出譔勒哲領苗軍繼進州民亦挺身巷戰士德大潰
十喪八九收殘兵攻海鹽又為乍浦鍾氏所撓後得

馬道驍勇禽獲苗軍無算崑山數為方國珍海軍攻擊託丁氏往來說合結為婚姻崑山之民幸遂蘇息湖之長興武康花鎗軍出沒雖互有勝負亦不勝其苦所跨三州皆隣勍敵十一月天兵取常州十七年攻長興士誠命趙打虎拒戰敗之潘元明復寇長興又敗之轉徇太湖馬跡山士誠將鈕律降乃取江陰士誠寇常熟廖永安大破於福山港中山王達分兵絕太湖遂取宜興士誠遣將據毗陵達圍之士誠遣

士德來援戰敗就擒俘致軍前太祖皇帝俾作書勸士誠降士德執不從士誠窮迫願就省相招安使者往返迄莫成事周仁自往陳請議始定十八年八月也元赦其罪省相達實特穆爾承制令參政周伯琦等至平江撫諭之授為太尉開府平江其衆授爵有差立江淮分省江浙分樞密院于平江以處之十九年元遣使以御酒龍衣賜士誠徵海運糧自是士誠每歲運粟十餘萬至燕京二十年士誠復遣李伯升

帥衆十萬寇長興開平王遇春援之伯升遁遇春追擊之斬首五千餘級二十三年九月士誠自稱吳王請命于元不報自是徵糧不與二十六年太祖皇帝

命以榜諭浙西

榜曰吳王令旨總兵官准中書省咨敬奉令旨予開伐罪救民王者之師

考之往古軒轅氏誅蚩尤殷湯征葛伯文王伐崇侯三聖人之起兵也非富天下本為救民近觀有元之末主居深宮臣操威福官以賄成罪以情免臺憲舉親而劾讐有司差貧而優富廟堂不以為慮方添冗官又改鈔法役數十萬民湮塞黃河死者枕藉於道哀苦聲聞於天不幸小民悞中妖術不解其言之妄誕酷信彌勒之真有與其治世以懸困苦聚為燒香之黨根據汝潁蔓延河洛妖言既行凶謀遂逞焚蕩

城郭殺戮士夫荼毒生靈無端萬狀元以天下兵馬
錢糧大勢而討之畧無功效愈見猖獗是以有志之
士傍觀熟慮乘勢而起或假元氏為名或託香軍為
號或以孤兵自立皆欲自為由是天下土崩瓦解予
本濠梁之民初列行伍漸至提兵灼見妖言不能成
事又度元運難興立功遂引兵渡江賴天地祖宗之
靈及將相之功一敵而有江左再戰而定浙東陳氏
稱號據我上游爰興問罪之師彭蠡交兵元惡授首
父子兄弟面縛興觀既待以不死又封以列爵將相
皆置於朝班民庶各安於田里荆襄湖廣盡入版圖
雖德化未及而政令頗修惟茲姑蘇張士誠為民則
私販貨貨行劫於江湖兵興則首聚光徒負固於海
島其罪一也又恐海隅一區雖抗天下全勢詐降於
元坑其參政趙璉囚其待制孫搦二也厥後掩襲浙
西兵不滿萬數地不足千里僭號改元三也初寇我
邊一戰生擒其親弟再犯浙省楊苗直搗其近郊首

尾畏縮又詐降於元四也陽受元朝之名陰行假王之令挾制達丞相謀害楊左丞五也占據江浙錢糧十年不貢六也知元綱已隆公然害其丞相達實特穆爾南臺大夫布哈特穆爾七也恃其地險食足誘我叛將掠我邊民八也凡此八罪又甚於蚩尤葛伯崇侯雖黃帝湯文興之同世亦所不容理宜征討以靖天下以濟斯民爰命中書左相國徐達摠率馬步舟師分道並進攻取浙西諸處城池已行戒飭軍將征討所到殲厥渠魁脅從罔治備有條章凡有遁逃臣民被陷軍士悔悟來歸咸宥其罪其滿張氏臣僚果能明識天時或全城附順或弃刃投降名爵賞賜予所不吝凡爾百姓果能安業不動即我良民舊有田產房舍仍前為生依額納糧以供軍儲餘無科取使汝等永保鄉里以全室家此興師之故也敢有千百相聚抗拒王師者即當移兵勦滅遷徙宗族於五溪兩廣永離鄉土以禦邊戎凡予之言信如皦日咨

爾臣庶毋或自疑敬此除敬遵外咨請施行准此合
依令旨出榜曉諭敬依令旨事意施行所有文榜須
議出給者龍鳳十二年五月二十一日日本州判官許士傑齎到八月大將軍達副將

軍遇春帥師二十萬南伐上戒以毋肆擄掠妄殺戮
毀廬舍丁寧全士誠母冢師至太湖擒士誠將尹義
陳旺遂次洞庭山士信在湖中不敢戰進次湖州毘
山敗士誠軍又進次三里橋張天騏黃寶陶子容唐
傑分兵拒戰敗之李伯升來援又敗之朱暹王晟戴
茂呂珍及五太子繼援又敗之

五太子者士誠養子
勇而善戰平地能躍

數丈士誠乃自來救戰于皂林復敗之呂珍李伯升皆

降朱文忠至杭州潘元明納款

其狀曰嬰城固守實受任之當為歸款救

民乃濟時之急務竊伏自念起身草野叨位省樞非心慕乎榮華乃志存乎康定豈意邦國殄瘁王師見加事雖貴于見機民實同于歸義念是邦生靈百餘萬比年物故十三今既入于職方欲溥覃于天澤謹將杭州土地人民及諸司軍馬錢糧之數以獻凡得兵二十餘萬湖州既下

兵轉至南潯王勝降至吳江困其城久之亦降達兵至鮎魚口擊走守將康茂才既而降至尹山橋又敗士誠軍焚戰舸千餘艘及積聚甚衆於是兵集城下

達軍於葑門遇春虎丘郭子興婁門華雲龍胥門康
茂才齊門湯和閭門王弼盤門張溫西門耿炳文城
東北仇成西南何文輝西北四面築合長圍架木棚
與城中浮圖等又築二臺以俯瞰城中號為敵臺上
置火筒及襄陽礮礮風扇人百里皆死吳元年六月
士誠覘城東軍整乃突出閭門將衝遇春營遇春覺
之分兵北濠截其後乃合戰士誠遣黃哈剌巴圖率
千人繼之自引兵於山塘為援王弼馳鐵騎鼓雙刀

而前遇春乘之士誠兵大敗人馬溺死沙盆潭無數
士誠墜馬幾不救時有倉腳夫十人號十條龍者絕
勇善鬪被錦衣銀甲出入陳中倏忽不可測亦溺死
士誠又幾溺匍匐興入城少頃復出胥門兵銳甚士
信坐城樓呼軍少休遇春乘其懈怠急擊大破之士信
據銀牀與偽參政謝節啗桃有飛礮碎其首死城中
亦作飛礮拆神祠民屋為礮具達令構木如屋覆以
編竹伏兵其下矢石不能及九月達兵破葑門

或有說云

達謂城乃龜形愈擊愈固猶藏六也
宜擊其尾尾者背門達從之果破

遇春破閭門新

寨兵皆薄城士誠陳於門內謝節樹柵以補外城唐
用仁徐義潘元紹皆降晡時軍蟻附以登城破士誠
與偽副相劉毅帥兵三萬自戰萬壽寺東復敗毅降
士誠從數騎歸府語其妻劉氏曰吾自應死汝曹奈
何劉曰妾自有處乃積薪齊雲樓下驅婦女上令養
子辰寶舉火焚之劉自經死左右皆散士誠獨坐室
中達令李伯升諭意士誠距戶自經伯升敗戶抱解

之復甦潘元紹繼至勸士誠士誠閉目不語昇入舟
俘于南京自縊死

洪武二年常熟盜朱蝦蟆劫庫作亂縣民殺之事詳宦
蹟條

景泰中嘉興人許道師以妖術行江湖間至尹山託居
民家夜稍出光怪愚民相率從之念彌勒佛肆為姦
汚事覺官發卒捕之道師縱火燒民舍掠資積驅子
女出震澤官兵夾岸追逐道師載重舟覆被擒送京

師斬之一時官民多以功遷賞

姑蘇志卷三十六

欽定四庫全書

姑蘇志卷三十七

明 王鏊 撰

宦蹟一

郡縣民之司命也有遺愛焉固不能忘而挽鄧推
謝亦輿情之不免者至於繩冗墨平穀祿典文教
總武備苟有可徵悉存其槩今制命臺憲近臣遞
出撫按庶政咸屬焉特稽其事及吾郡者述之

顏驕漢武帝至郎署見一郎須眉皓白問為郎幾時對

曰臣自文帝時為郎上曰何久不遷對曰文帝好文而臣善武景帝好美貌而臣貌醜陛下好年少而臣已老是以終身不遇也上感其言即日擢為會稽都尉

周君陽朔三年為守造母陵道見越絕書又會稽志云

陽嘉二年刻石旌表義里

按陽當作鴻

任延字長孫宛人更始元年拜會稽都尉時年十九迎官驚其壯及到靜泊無為唯先遣饋禮祠延陵季子

時道路未通避亂江南者未還中土會稽頗稱多士
延聘請高行如董子儀嚴子陵等待以師友掾吏貧
者輒分俸賑給之省諸卒令耕公田以周窮急每時行
縣輒使慰勉孝子就餐飯吳有龍丘萇隱居太末志
不降辱王莽連辟不到遣功曹奉謁脩書記致醫藥
吏使相望於道積一歲萇乃詣府願先死備錄延辭
讓再三遂署議曹祭酒萇尋卒延自臨殯不朝三日
是以郡中賢士大夫爭往宦焉建武初徵為九真太

守

李君更始五年為守治東倉為屬縣屋

見越絕書

彭脩字子陽毗陵人年十五父為郡吏得休與脩俱歸
道為盜所劫脩困迫乃拔佩刀前持盜帥曰父辱子
死卿不顧死耶盜相謂曰此童子義士也不宜逼之
遂謝去後仕郡為功曹時西部都尉宰鼂行太守事
以微過收吳縣獄吏將殺之主簿鍾離意爭諫甚切
鼂怒使收縛意欲案之掾吏莫敢諫脩排閣直入拜

曰明府發雷霆於主簿請聞其過鼂曰受教三日初
不奉行廢命不忠豈非過耶脩曰昔任座面折文侯
朱雲攀毀闌檻自非賢君焉得忠臣今慶明府為賢
君主簿為忠臣鼂遂原意罰貲獄吏罪後州辟從事
時賊張子林等數百人作亂郡言州請脩守吳令脩
與太守俱出討賊賊望見車馬競交射之飛矢雨集
脩障扞太守為流矢所中死太守得全賊素聞其恩
信即殺弩中脩者餘悉降散言曰自為彭君故降不

為太守服也

吳錄作彭循字子陽建國二年海賊丁儀等萬人據吳太守秋君聞循勇

謀以守命循與儀相見陳說利害應時俱散民歌之曰時歲倉卒賊縱橫大戟長弩不可當賴得賢令彭

陽子

鍾離意字子阿山陰人少為郡督郵時部縣亭長有受

人酒禮者府下記案考之意封還記入言於太守曰

政化之本由近及遠今宜先清府內直濶略遠縣亭

細微之愆太守甚賢之遂任以縣事建武十四年會

稽大疫死者萬數意獨身自巡視經給醫藥所部多

蒙全濟舉孝廉光武目為良吏除瑕丘堂邑二縣令

後徵為尚書轉僕射出為魯國

意別傳云建武十四年太守汝南黃讜召

意署北部督郵吳中大疫黃君轉署意為中部督郵意乃露車不冠身不修整行病者門入其家至與醫藥詣神廟為民禱祭召醫數百人令和草藥恐醫或以毒藥過劑賊害民命先自吞嘗然後行之其所臨護四千餘人後日府君出省災百姓攀車言曰明府不須出但得鍾離督郵民皆活也又會稽典錄郡署意比部督郵烏程男子孫常弟烈分居各得田半頃烈死歲饑常稍以米粟給烈妻子輒追計直作券沒取其田烈兒長大訟常掾史議皆曰烈孫兒遭饑賴常升合長大成人而更爭訟非順孫也意獨曰常身為遺父當撫孤弱是人道正義稍以升合券取其田懷挾姦路貪利忘義烈妻子雖以田與常困迫之

至非私義也請常田俾烈
妻子於是衆議無以奪之

包咸字士良曲阿人少為諸生受業長安師事博士右
師細君習魯詩論語王莽篡去歸鄉里於東海界為
赤眉賊所得遂見拘執十餘日咸晨夜誦經賊異而
遣之因住東海立精舍講授光武即位乃歸鄉里太
守黃讜署戶曹史欲召咸入教其子咸曰禮有來學
而無往教讜遂遣子師之舉孝廉除郎中建武中入
授皇太子論語拜諫議大夫後遷大鴻臚

吳錄咸署
戶曹史轉

署主簿太守黃君行春咸留守郎君緣樓探雀卵咸責數云春即不宜破卵而又升危非子道杖三十

陸璿字仲芳毗陵人操履清正明京氏易尚書風角星算皆極精奧辟主簿視事旬日謝病去隱會稽山

王關字選公無錫人明易及天文郡舉為主簿更始平守山陰令補御史不交豪強人號王獨坐

黃昌字聖真餘姚人本出孤微居近學宮數見諸生修庠序之禮因好之遂就經學又曉習文法仕郡為決曹刺史見而奇之辟從事復拜宛令政尚嚴猛好發

姦伏歷遷至將作大匠大司農

第五倫字伯魚長陵人少有義行建武二十九年拜會稽太守躬自斬芻養馬妻執炊爨受俸裁留一月糧餘皆賤賣與貧羸之民俗多淫祀常以牛祭神財產困匱其自食牛而不以薦祠者發病且死為牛鳴前後郡將莫敢禁倫移書屬縣曉告百姓其巫祝託鬼神詐怖愚民皆案論之有妄屠牛者吏輒行罰百姓以安署督郵謝夷吾為主簿鄉嗇夫鄭弘為督郵舉

許武孝廉永平五年坐法徵老小攀車馬嗥呼相隨
日裁行數里倫乃偽止亭舍陰乘船去及詣廷尉吏
民上書守闕者千餘人詔公車諸為會稽太守上書
者勿復受會帝幸廷尉錄囚得免歸田里後官至司
空

謝夷吾字堯卿山陰人少為郡吏學風角占候太守第
五倫擢為督郵時烏程長有減釁倫使收案其罪夷
吾到縣無所驗但望閭伏哭而還白倫曰竊以占候

知長當死非刑所加故不收之倫聽其言至月餘果
有驛馬齎長印綬上言暴卒倫以此益信禮之舉孝
庶為壽張令稍遷荊州刺史鉅鹿太守所在有善
績倫作司徒令班固為文薦夷吾曰竊見鉅鹿太守
會稽謝夷吾出身東州英姿挺特少膺儒雅綜校圖
錄昔為陪隸與臣從事奮忠毅之操躬史魚之節及
應選作宰惠敷百里爰牧荊州威行邦國遷守鉅鹿
政合時雖宜當拔擢使登司臣以頑駑尸祿負乘

願乞骸骨更授夷吾以厭率土之望後左轉下邳令
豫尅死日如期果卒

鄭弘字巨君山陰人少為鄉耆夫太守第五倫奇之召
署督郵舉孝廉拜騶令累遷尚書令平原相待中大
司農太尉

尹興明帝時為守楚王英謀反陰疏天下善士有興名
及英事覺與門下掾陸續主簿梁松功曹史駟勲俱
詣廷尉獄赦還鄉里

詳見陸續傳

王充字仲任上虞人受業太學師事扶風班彪後歸鄉里屏居教授明帝時仕郡為功曹以數諫爭不合去刺史董勤辟為從事轉治中自免還家年漸七十乃閉門潛思著論衡八十五篇

慶鴻

何敞傳作慶弘

洛陽人慷慨有義節與廉范為刎頸交仕

至會稽太守所在有異績

張霸字伯饒成都人永元中為會稽太守表用郡人處士顧奉公孫松等奉後為潁川太守松為司隸校尉

並有名稱其餘有業行者皆見擢用郡中爭厲志節
習經者以千數道路但聞誦聲野無遺寇民語曰城
上烏鳴哺父母府中諸吏皆孝子霸視事三年遂上
病後徵四遷為侍中卒翟酺與諸儒門人追錄本行
謚曰憲文

續漢書曰霸為郿越賊歸附童謠
曰棄我戟捐我矛盜賊盡吏皆休

馬稜字伯威茂陵人援族孫也永元中轉會稽太守稜
素威嚴治郡有聲

蔡君修武人元初中以平寇功符守吳郡復牧青州

其按

于高邑令湛碑云云然安
帝時郡未分當作會稽是

趙牧字仲師長安人少以公正稱及治郡有聲績

戴就字景成上虞人仕郡倉曹掾刺史歐陽參奏太守
成公浮臧罪遣部從事薛安案倉庫簿領收就考掠
就慷慨直辭安竒其壯節表其言解釋郡事徵浮還
京師免歸太守劉寵舉就孝廉光祿主事

劉府君永建四年為守始奏分會稽郡置吳郡

王衡永和三年郡丞羊珍反衡破斬之

武開明永和二年舉孝廉除郎中謁者漢建安二年遷
大長秋丞長樂太僕丞永嘉元年喪母去官復拜郎
中除吳郡府丞建安二年卒

韓整守吳創吳泰伯廟

見唐春申君碑又吳會稽太守
濮陽興問書佐山陰朱育曰昔

韓吳郡問士於劉
聖博疑即整也

麋豹東海人為吳郡太守永興二年建吳泰伯廟閭門
外嘗按行屬城問功曹唐景風俗所尚景曰處家無
不孝之子立朝無不忠之臣文為儒宗武為將帥時

人以為善言

東門與歷吳濟陰二郡太守所在貪濁謠曰東門與取
吳半吳不足濟陰續

李肅潁川人桓帝時太守舉陸康孝廉肅後坐事誅康
為歛尸送喪還鄉行服

徐參良成人中常侍璜之弟吳郡太守時刺史陳翔舉
奏參在職貪穢徵詣廷尉翔由此威名大振

陳瑀字公瑋淮浦人光漢元年以安東將軍行吳郡太

守建安二年曹操遣議郎王誦奉詔以孫策為騎都尉領會稽太守又敕徐州牧呂布及瑀同討袁術策自謂統兵但以騎都尉領郡為輕乃諷誦承制假策明漢將軍時瑀屯海西策治嚴當與布瑀參同形勢行到錢唐瑀陰圖襲策遣都尉萬演等密渡江使持印傳三十餘結賊與丹陽宣城涇陵陽始安黠歙諸險縣大帥祖郎焦巴及烏程嚴白虎等使為內應伺策軍發欲攻取諸郡策覺之自將討虎別遣呂範徐

逸攻瑀於海西瑀單騎奔袁紹策梟其大將陳牧獲
吏士妻子四千人瑀從兄子廣陵太守登治射陽陰
遣間使以印綬與白虎餘黨以報瑀見破之辱策討
登歸丹徒遂為許貢奴客射死瑀領郡凡六年

許貢為吳郡太守興平二年奏分烏程為永縣時孫策
方起貢表聞漢帝云策驍雄與項籍相似宜加賚寵
召還京邑若實於外必為世患策候吏得表以示策
策遂殺貢貢小子與客亡匿江邊策單騎出貢客擊

傷策病創死

朱治字君理故鄣人興平初勸孫策平定江東時在壽春後遷吳郡都尉從錢唐欲進到吳吳郡太守許貢拒之於由拳治與戰大破之貢南就山賊嚴白虎治遂入郡領太守事黃武元年封毘陵侯領郡如故二年徙封故鄣歲餘還吳三年卒初治領郡舉孫權為孝廉後權為吳王治每進見權常親迎執板交拜其見異如此

盛憲字孝章會稽人器量雄偉遷吳郡太守以病去官
憲居陽羨兄弟三人總為一時名士弟宏居吳少有
慷慨士風宏弟仲居會稽有聲望憲子匡奔魏位至
征東司馬

芮祉字宣嗣丹陽人從孫堅征伐有功堅薦為九江太
守轉吳郡所在有聲

滕胤字承嗣劇人有操節美儀容年十七尚公主建安
二十年起家丹陽太守徙吳郡所在見稱每聽辭訟

察言觀色務盡情理人有窮寃對之流涕

吳展字士季下邳人仕吳為吳郡太守吳平還鄉里閉門自守不交賓客郡人蔡洪答刺史周浚論吳士書曰士季忠足矯非清足厲俗信可結神才堪幹世誠聖世之老成明時之俊乂也

謝承字偉平山陰人孫權夫人之弟也為吳郡督郵歲穰有嘉禾六穗生於部屬拜五官郎中稍遷長沙東部都尉武陵太守博學洽聞嘗所知見終身不忘撰

後漢書百餘卷子崇勛並知名勛吳郡太守封蘭亭侯

太史亨字元復東萊黃人建昌都尉慈之子歷官尚書

吳郡太守越騎校尉

范志亨作亭又云一名高

胡沖固始人父綜少孤母將避難江東孫策領會稽太守綜年十四為門下循行留吳與孫權共讀書策薨權以綜為金曹從事官至侍中沖仕吳中書令晉尚書郎吳郡太守

賀邵字興伯山陰人吳景帝休即位為吳郡太守初不出門諸強族輕之乃題府門云會稽雞不能鳴邵聞故出行至門反顧索筆足之云不可鳴殺吳兒於是至諸屯郎檢校顧陸役使官兵及藏逋亡悉以言上罪者甚衆陸抗時為江陵都督自請攻孫皓然後得釋邵奉公貞正後被譖殺子循孫道力

循字彥先操尚高厲童戲不羣言行進止必以禮讓陳敏之亂循與吳郡朱誕不豫其事敏破除吳國內史

不就元帝為安東將軍復上循為吳國內史

見世說亦載題

門事與父卽傳語同必有一誤道力吳令

傅咸字長虞北地人司隸校尉玄之子也累遷吳國內史顧榮與親故書曰傅長虞勁直忠果雖非周才亦足貴也卒謚曰貞

殷祐字慶元雲陽人擢吳郡太守嘗上箋論顧榮功高贈典不稱由是榮得加贈

鄧攸字伯道襄陵人元帝以為太子中庶子時吳郡闕

守人多欲之帝以授攸攸清和平簡真正寡欲載米
之郡俸祿無所受唯飲吳水而已時郡中大饑攸奏
賑貸未報乃輒開倉救之臺遣散騎常侍桓彝虞驤
慰勞飢人觀聽善否乃劾攸以擅出穀俄有詔原之
并令桓彝省其衆役攸在郡政清明百姓歡悅為中
興良守後稱疾去職郡嘗有送迎錢數百萬攸不受
一錢百姓數千人牽攸船不得進攸乃小停夜中發
去

吳錄攸罷郡人入水攀其船
悲號哭泣送三百里不忍別

吳人歌云統如打五

鼓雞鳴天欲曙鄧侯挽不來謝令推不去百姓詣臺
乞留一歲不聽

張茂字偉康會稽人少有志行與同郡孔愉敬康丁潭
世康俱著名號會稽三康元帝辟茂為掾屬太子衛
率大興中出補吳國內史茂初夢得大象以問占夢
萬雅雅曰君當為大郡而不善也象大獸取其音狩
故為大郡然象以齒焚身後當為人所殺及在郡聞
齋內牀下犬聲求而不獲既而地坼有二犬子取養

之皆死永昌元年茂與三子俱為沈充所害追贈太保

應詹字思遠南頓人性質素以學藝文章稱元帝雅重其才以後軍將軍出補吳國內史坐公事免

樂謨字弘範涑陽人尚書令廣之子也渡江為征虜將軍吳國內史

趙穆字季子汲郡人正淑平粹才識清通為明帝師歷冠軍將軍吳郡太守

庾冰字季堅鄆陵人驃騎大將軍璠之子司空亮之弟
也以雅素為時論所重王導請為司徒左長史補吳
國內史咸和二年蘓峻作逆矯詔大赦遣兵攻冰冰
不能禦棄郡奔會稽會稽內史王舒以冰行奮武將
軍距峻別率張健於吳中時健黨甚衆諸將莫敢先
進冰率衆擊健走之於是乘勝西進赴京師又遣司
馬滕含攻賊石頭城拔之冰勲為多封侯不受卒謚
忠成

世說蘓峻之亂諸庾逃散冰時為吳郡單身奔
亡民吏皆去唯郡卒獨以小船載冰出錢唐口

蘧蓀覆之時峻賞募覓冰屬所在搜檢甚急卒舍船
市渚因飲酒醉還舞擢向船曰何處覓庾吳郡此中
便是冰大惶怖然不敢動監司見船小裝狹謂卒狂
醉都不復疑自送過浙江寄山陰魏家得免後事平
冰報卒適其所願卒曰出自厠下不願名器少苦執
鞭恒患不得快飲酒使其酒足餘年畢矣無所復須
終其身時謂此卒非唯有智且亦達生子希從子羲
曾孫登之

希字始彥自侍中出為輔國將軍吳國內史後死於桓

溫之難

羲字羲叔亮之子也少有時譽穆帝時為建威將軍吳

國內史時帝雅愛文義義至郡獻詩頗存諷諫未見用而卒

登之字元龍以司徒左長史為南東海太守府公彭城王義康專攬政事而登之性剛每陳己意義康不悅出為吳郡太守州郡相臨執意無改後以事免官

蔡謨字道明考城人歷遷侍中蘓峻構逆庾冰出奔乃以謨為吳國內史既至與張閭顧衆顧颺等共起義兵迎冰還郡峻平復為侍中卒謚文穆

虞潭字思與餘姚人清貞有檢操蘓峻反潭守吳興加
督三吳晉陵宣城義興五郡軍事與郗鑒王舒協同
義舉陶侃假潭節監揚州浙江西軍事遣督護沈伊
距管商於吳縣為商所敗潭自貶尋而峻平轉鎮東
將軍吳國內史以前後功進爵武昌縣侯徙會稽內
史未發還復吳郡時軍荒之後百姓飢饉死亡塗地
潭表出倉米振救又脩滬瀆壘以防海鈔百姓賴之
咸康中卒謚孝烈孫嘯父

嘯父太元中為吳國內史隆安初徵補尚書未發而王
廩舉兵叛以嘯父行吳興太守入吳興義興為廩聚
兵輕俠赴者萬計廩敗應斬詔以祖舊勲聽以侯贖
為庶人嘯父從父谷

谷字長風吳興太守駿之子也仕吳國內史

王恬字敬豫臨沂人丞相導之子也少好武卓犖不羈

晚節更好士起為吳國內史卒謚憲侯

世說謝太傅嘗與謝萬共

過吳郡萬欲共草王恬許太傅云恐伊不必酬汝意
萬乃獨往坐少時王便入門內謝以為厚待已良久

乃沐頭散髮而出據胡牀在中庭曬頭神色傲邁了無相酬對意謝乃還未至船逆呼太傅曰阿螭不作

爾恬小弟洽幼會

洽字敬和導第三子兄弟中最知名歷建武將軍吳國

內史為士民所懷在郡上表有曰編戶僵尸葬殮無

主或閭門餓餒烟火不舉徵拜領軍有清裁之稱子

珣

珣字元琳孝武時歷輔國將軍吳國內史在郡為士庶

所悅太元十五年徵為尚書左僕射卒謚獻穆子弘

曇首

弘字休元少好學以清恬知名大司馬右長史轉吳國
內史義熙十一年徵為太尉長史錄尚書事謚文昭
曇首徵吳郡太守不赴弘孫僧達

僧達幼聰敏孝武以為征虜將軍吳郡太守時暮歲五
遷彌不得意吳郭西臺寺多富沙門僧達求須不滿
乃遣主簿顧曠率門義劫寺中沙門竺曇瑤財數百
萬荆江反叛加僧達置佐領兵臺符聽置千人而輒

立三十隊隊八十人又立宅於吳多役公力坐免官
至中書令賜死

劭字敬倫導第五子清修簡貴善治容儀有風操桓溫
稱為鳳雛累遷為建威將軍吳國內史卒謚簡

蒼字敬文恬虛守靖不競榮利歷建威將軍吳國內史
年饑粟貴人多死亡蒼出私米作饘粥以飴餓者所
活甚衆遷尚書領中護軍復為征虜將軍吳國內史
轉會稽內史孫琨

琨少謹篤泰始中出為冠軍將軍吳郡太守遷中領軍
坐在郡用朝舍錢三十六萬營餉二宮諸王及作絳
襖奉獻軍用左遷光祿大夫

誕字茂世父混誕少有才藻隆安七年以太尉長史為
吳國內史母憂去職

按隆安止五年云七年誤

王侃臨沂人太保祥從孫國子祭酒琛之子也少歷顯
職位至吳國內史

荀誕字令遠潁陰人光祿大夫崧之子也有儀操風望

為簡文帝所重後除建威將軍吳國內史卒官弟羨
羨字令則資稟逸羣清和有識裁殷浩為揚州刺史以
羨有令問引為建威將軍吳國內史時年二十七中
興方伯之少未有若羨者明年卒

刁彛字士海饒安人協之子也斬讎人黨以祭父墓由
是知名歷尚書吏部郎吳國內史咸安二年降封東
海王奕為海西公徙吳縣西紫里勅彛防衛寧康初
轉北中郎將徐兗二州刺史

譙敬王恬字元愉忠正有局幹領左衛將軍補吳國內史又領太子詹事以宗室勲望有才用武帝時深仗之以為都督子允之

允之字季度歷輔國將軍吳國宣城譙梁內史王恭庾楷桓玄內伐允之兄弟拒楷斬其將段方元興初徙廣州被害

何澄字季玄潯人清正有器望孝武深愛之以為冠軍將軍吳國內史太元中徵拜尚書孫叔度

叔度義熙中為金紫光祿大夫吳郡太守王弘每稱其
清身潔已子尚之為吏部郎告休定省傾朝送別於
冶渚至郡叔度謂曰聞汝來傾朝送別可有幾客荅
曰殆數百人叔度笑曰此是送吏部爾非關何彥德
也曾孫戢

戢字慧景金紫光祿大夫偃之子也尚山陰公主歷侍
中濟陰太守出為吳郡太守以疾歸為侍中秘書監
卒謚懿子

王愷字茂仁晉陽人丞相坦之之子太元末為侍中出為吳國內史未發徵為丹陽尹桓玄等至江寧領兵守石頭俄而玄等走復為吳郡病卒

桓謙字敬祖龍亢人父沖侍中謙詳整有器望歷輔國將軍吳國內史隆安三年孫恩陷會稽謙委官出奔無錫徵拜尚書驃騎大將軍後以亂蜀伏誅

袁山松陽夏人少負才名博學有文章著後漢書百篇歷祕書監吳國內史孫恩作亂吳會承平日久人不

習戰所在多破亡吳國內史桓謙出奔山松築滬瀆

壘緣海備恩明年恩復入浹口轉寇滬瀆害山松

部人海鹽李祥突白刃收山松
歸葬後人表祥居為教義里

魏詠之字長道任城人家貧好學不倦桓玄篡位協贊

義謀義熙初進征虜將軍吳國內史尋轉荊州刺史

卒追謚曰桓

劉柳字叔惠涅陽人其先漢宗室也柳有名譽少登清

官歷後將軍吳國內史以顏延之為行參軍主簿

柳將
謝氏

姊俱行即瞻之叔母
瞻幼孤亦偕至吳

丘淵之字思玄烏程人博學有才識宋文帝即位以舊
恩歷侍中都官尚書吳郡太守所著文章百卷歷吳
會稽丹陽三郡

王韶之字休泰臨沂人好史籍私撰晉安帝陽秋序王
氏過惡少帝即位以侍中出為吳郡太守王弘入相
領揚州刺史韶之在郡常慮為弘所繩夙夜勤厲政
績甚美弘亦抑其私憾文帝兩嘉之時稱韶之良守

徵為祠部尚書

劉式之字延叔莒人尚書左僕射穆之仲子通易好士
以左衛將軍為吳郡太守謚恭侯

江夷字茂遠考城人父戮夷少自澡厲美風儀善舉止
景平二年由吏部尚書出為吳郡太守富陽縣賊孫
法亮作亂攻永興會稽太守素澹之遣隊主陳願等
破賊夷輕行之職停吳一宿進至富陽分別善惡執
送願徙賊黨數百家於彭城諸處及營陽王在吳縣

見害夷臨哭盡禮以兄疾去官後為右僕射歷任以
和簡稱曾孫數

數字叔文好文辭有風格永明七年領驍騎將軍歷吳
郡太守卒謚敬子

徐佩之字希季郟人武帝以其姻戚累加寵任遷侍中
射聲校尉未拜出為吳郡太守還除吏部尚書丹陽
尹元嘉三年羨之既誅文帝特宥佩之免官而已其
冬佩之謀反事發被誅

劉損字子騫蕭人衛將軍毅從父弟也元嘉中為吳郡至閭門便入太伯廟室宇隤毀垣墻不修損愴然曰清塵尚可彷彿衡宇一何摧隤即令修葺

殷穆長平人以和謹致稱為五兵尚書吳郡太守官至特進謚元子

劉斌由吳郡太守為司徒彭城王義康長史元嘉十七年義康專政欲以斌為丹陽尹言次啓上陳其家貧言未卒上曰以為吳郡後與王履等謀欲使大業歸

義康既而被收初斌在吳數有妖異至是伏誅

劉禎元嘉中為守十八年鹽官獲白雀禎獻於朝二十四年鹽官復產白雀又獻之

羊玄保太山南城人以太常徙吳郡太守加秩中二千石三吳舊有鄉射禮玄保舉行之文帝以其廉素寡欲頻授名郡為政雖無殊績而去後常必見思不營財利產業儉薄大明中加散騎常侍特進卒謚曰定子

王翼之字季弼臨沂人黃門侍郎徽之孫也仕御史中丞吳郡會稽太守大明二年在任有白燕產郡城翼之獻于朝卒謚肅子

王曇生臨沂人父弘之曇生好文義以謙和見稱歷吏部尚書吳郡吳興太守

謝莊字希逸陽夏人侍中弘徽之孫也七歲能屬文文帝見之曰藍田生玉豈虛也哉素淑覽其賦稱為江東獨步大明中除吳郡太守廢帝即位改中書令加

金紫光祿大夫卒謚憲子

始平孝敬王子鸞字孝羽孝武帝第八子大明四年為東中郎將吳郡太守改封新安王以冠軍長史蕭惠開行郡事五年遷北中郎將南徐州刺史子鸞受冠諸子凡上所盼矇者莫不入其府及為南徐又割吳郡以屬之前廢帝即位賜死年十歲弟曰子仁字孝和孝武第九子也大明五年封永嘉王遷東中郎將吳郡太守明帝即位賜死亦甫十歲

王延之字希季臨沂人少靜默不交人事明帝時為吳郡太守罷郡歸家產無所增益居身簡素清靜寡欲凡所經歷務存不擾謚簡子

褚淵字彥回陽翟人尚書左僕射湛之子也尚南郡公主明帝時為吳郡太守帝寢疾危殆馳使召之欲托後事及至帝坐帳中流涕語之復為吏部尚書謚文簡弟澄

澄字彥道雅有才量尚廬江公主歷官清顯建元中為

吳郡太守

澄博好經方凡療病無貴賤皆先審其苦樂榮悴鄉壤風俗水土所宜氣血強弱然

後裁方用藥為郡日有百姓李道念以公事到郡澄謂曰汝有重疾答曰病冷五年澄為診脈曰汝病非冷非熱當是食白淪鷄子過多所致今取鵝一升炙服之吐出物如升涎裏之動問看是雞雛羽翅爪距具足能行澄曰此未盡更服所餘藥又吐得如向者五十三頭而病瘥

袁洵陽夏人為吳郡太守卒謚曰貞

弟子繁舊名慙孫幼孫好學有清才

隨洵在郡擁蔽來讀書足不踰戶或有欲與洵子顗婚洵曰顗不堪政可與慙孫婚耳

柳世隆字彥緒解人元景弟子也為左將軍吳郡太守

加秩中二千石居母憂寒不衣絮卒謚忠武

蕭順之字文緯梁武帝父也齊高帝時歷黃門郎安西
長史吳郡太守所在著名郡人張緒嘗曰文武兼資
有德有行吾敬蕭順之

安陸昭王鈞字景業建元元年出為輔國將軍吳郡太
守政有能名竟陵王子良與之書曰竊承下風數十
年來姑蘓未有此政武帝嘉之轉郢州刺史

沈文季字仲達武康人司空慶之之子也永明元年以
太子詹事出為左將軍吳郡太守三年進號平東將

軍富陽人唐寓之作亂破錢唐等縣文季發兵救之
四年轉都官尚書卒謚忠憲

王慈字伯寶臨沂人僧虔子也歷豫章內史父憂去官
起為建武將軍吳郡太守遷寧朔將軍大司馬長史
卒謚懿

邵陵王子貞字雲松武帝第十四子也永平十年為東
中郎將吳郡太守建武二年被誅年十五

王思遠琅邪人立身簡潔邵陵王子貞為吳郡除思遠

吳郡丞以本官行郡事論者以為得人

南康侯子恪字景冲齊高帝之孫永明中封建武中遷
輔國將軍吳郡太守永泰元年大司馬王敬則反於
會稽奉子恪為名子恪奔走不知所在始安王遙光
勸上併誅高武子孫於是並勅竟陵王昭胄等入永
福省是夕三更子恪徒跣奔至建陽門上聞驚覺撫
牀曰遙光幾悞人事及見子恪顧問流涕以為太子
中庶子梁大通二年出為寧遠將軍吳郡太守三年

卒于郡舍謚恭子子恪次弟子操封泉陵侯建武中
解褐為給事中避王敬則難歸為吳郡太守永元中
為黃門郎

李元履蘭陵承人幼有操業甚嫻政體入梁為吳郡太
守

王騫字思寂臨沂人太尉文憲公儉之長子梁度支尚
書中書令天監五年出為東陽太守尋徙吳郡八年
遷太府卿歷侍中中書令弟暕子規

陳字思晦弱冠尚宋淮南長公主仕梁雲麾將軍吳郡
太守普通三年徵為尚書左僕射歷國子祭酒卒謚
曰靖

規字威明神峯標映時稱俊人中大通二年為太子中
庶子尋為吳郡太守簡文帝為作謝章曰臣今駕吉
祥之車入句吳之境驅緹扇之馬撫奉德之鄉製錦
何階縻絲方始主書芮珍宗家在吳前守宰皆傾意
奉之至是珍宗假還規過之甚薄珍宗還都密奏規

不理郡事召為左戶尚書郡境千餘人詣闕請留表
三奏不許求於郡樹碑許之卒謚曰文

索昂字千里陽夏人右將軍覲之子也齊吳興太守梁
武起兵州郡皆降昂獨拒境天監中歷國子祭酒八
年出為仁威將軍吳郡太守十一年入為五兵尚書
卒謚穆正公子君正

君正字世忠美風儀早得時譽當官蒞事有名遷吳郡
太守將之官到既祖道於征虜亭謂君正曰昨策生

蕭敏孫徐孝充非不解義至於風神器局去賢子遠
矣侯景亂弟泌欲求為將梁簡文帝版泌為紫宮領
直令往吳中召募士卒君正率數百人隨邵陵王綸
赴援及臺城陷還郡太清三年三月景遣儀同于子
悅張大黑入吳君正蓄聚財產服玩靡麗新城戍主
戴僧易勸令拒守已以戍兵自外擊之君正不能決
吳人陸映公等懼不濟勸之迎賊君正性怯懦乃送
米及牛酒郊迎賊賊掠奪其財物子女因感疾卒子

悅等又破掠吳中多所調發逼掠子女毒虐百姓吳人莫不怨憤各立城柵拒守五月景遣中軍侯子鑒入吳軍收子悅太黑還京斬之

蔡搏字景節考城人尚書興宗子也仕梁侍中吳興太守中書令普通三年出為宣毅將軍吳郡太守四年卒謚康子

何敬容字國禮潯人侍中昌寓子也尚齊長城公主普通四年出為招遠將軍吳郡太守為政勤恤民隱辯

訟如神視事四年治為天下第一吏民詣闕請樹碑
詔許之大通二年徵為中書令未拜復為吏部尚書
卒

南浦侯推字智達梁文帝第七子少清敏好屬文深為
簡文所親賞大通後出為戎昭將軍吳郡太守所臨
赤地大旱吳人號旱母侯景之亂守東府城陷握節
死之

臨賀王正德字公和梁文帝子臨川王宏第三子也中

大通四年為信武將軍吳郡太守後徵為侍中

江革字休映考城人齊司徒竟陵王西邸學士梁武帝時歷官會稽郡丞行府州事以清貧著稱除都官尚書尋監吳郡時境內荒儉劫盜公行革至郡唯有公給仗身二十人百姓皆懼不能靜寇革復省游軍尉百姓逾恐革乃廣施恩撫明行制令盜賊靜息吏民安之武陵王出鎮江州革同行除推替甚美南中郎長史潯陽太守徵入為度支尚書還家除光祿大夫

卒謚曰彊子革歷官八府長史四王行事三為二千石傍無姬侍家徒壁立時以此高之

何達字義方郟人梁初為後軍鄱陽王恢錄事參軍歷始興內史在官好開涂巷修葺牆屋人屋市里城隍廐庫所過若營家焉田秩奉錢一無所取性尤果斷人畏而惜之所至皆生為立祠表言政狀帝每優詔答焉後歷給事黃門侍郎信武將軍監吳郡在吳頗有酒失遷耒陽太守遠平生處職疾強富如仇讎視

貧細如子弟特為豪右所憚性耿介無私曲絕請謁
未嘗以顏色下人多為俗士所疾其清公實為天下
第一居數郡見可欲終不變其心妻子饑寒如下貧
者後為征西諮議參軍中撫軍將軍

謝舉字言揚陽夏人大同三年出為雲麾將軍吳郡太
守先是何敬容有美績世稱何吳郡及舉為政聲跡
略相比嘗要何徵君講中論何難以巾褐入南門乃
從東園進致詩往復為虎丘山賦題于寺五年十二

月入為侍中中書監尚書令

安陸王大春字仁經簡文帝第八子少博涉書記天性
孝謹太清三年七月侯景以大春為吳州刺史大寶
元年封安陸郡王出為東揚州二年遇害

南海王大臨字仁宣簡文帝第四子大寶元年除安東
將軍吳郡太守時張彪起義會稽吳人陸令公潁川
庾孟卿等勸大臨投之大臨曰彪若成功不藉我力
如有撓敗以為說焉不可往也二年侯景廢帝豫章

王棟即位使害大臨於吳郡年二十五

張彪不知何許人自云家本襄陽少亡命在若耶山為盜侯景將宋子儼攻東揚州彪以南郡王前中兵參軍義舉征子儼不捷大寶二年齊高洋遣郭元建謀襲建業陳武帝馳報江陵元帝詔王僧辯赴援僧辯次姑孰先命侯瑱築壘於東關以拒北寇時彪為吳郡太守僧辯徵彪與吳興太守裴之子預平侯景封南移縣侯拜信義太守累遷南丹陽蘭陵晉陵太守

智武將軍後為周迪所害謚忠愍

王僧智祁人父僧念僧智為吳郡太守會陳霸先殺其
兄僧辯僧智舉兵據郡霸先遣黃侔率衆攻之僧智
出兵拒於西閭門佗不能克別令裴忌倍道夜薄其
城僧智奔吳興太守杜龕陳禧獲龕僧智與弟僧惜
奔齊就南豫州刺史任約約敗走僧智肥不能行竟
遇害龕僧辯壻也

裴忌字無畏聞喜人少聰敏有識量頗涉史傳侯景亂

隨陳霸先征討有功霸先遣黃侔攻王僧智不能克
謂忌曰三吳奧壤舊稱饒沃雖凶荒之餘猶為殷盛
而今賊徒扇聚天下搖心非公無以定之宜善思其
策忌乃勒部下精兵輕行倍道自錢唐直趣吳郡夜
至城下鼓譟薄之僧智疑大軍至輕舟奔杜龕忌入
據郡霸先表授吳郡太守及受禪徵為左衛將軍

沈君理字仲倫吳興人美風儀博涉經史有識鑒梁末
陳高祖命監吳郡高祖受禪為吳郡太守時兵革未

寧百姓荒散軍國之用咸資東境君理招集士卒修治器械民下悅附以幹理見稱世祖嗣位徵為侍中卒謚貞憲

徐度字孝節安陸人少儻不拘小節以驍勇聞陳文帝嗣位命為使持節散騎常侍鎮東將軍吳郡太守天嘉初以平王琳功改封湘東郡公位至司空謚忠肅子敬成幼聰慧好讀書永定三年為洗馬時度為吳郡太守以敬成監郡卒謚曰思

鄱陽王伯山字靜之文帝第三子天嘉元年封仍授東
中郎將吳郡太守六年為南徐州刺史

晉安王伯恭字肅之文帝第六子天嘉六年封仍授平
東將軍吳郡太守置佐史時年十餘歲便留心政事
官曹緝理太建元年加中護軍進號安南將軍國亡
入隋歷太常少卿

長沙王叔堅字子成高宗第四子也母本吳中酒家隸
高宗召拜叔儀叔堅少傑黠凶虐太建元年立為長

沙王仍為東中郎將吳郡太守

永陽王伯智字策之文帝第十二子少惇厚有器局博涉經史天嘉中為吳郡太守聞陸慶名欲見不可詣慶宗人榮宅穿壁觀之累遷尚書左僕射

嗣衡陽王伯信字孚之文帝第七子為吳郡太守舉郡人張乾孝廉隋師渡江與臨汝侯方慶並為東衡州刺史王勇所害

蕭瑛字欽文齊明帝第三子少聰敏解屬文梁封義興

王荊州刺史隋軍至都州璠與叔父巖歸陳璠為侍
中禎明初置吳州以璠為安東將軍吳州刺史甚得
物情陳亡吳人推璠為主又見梁武簡文及啓歸等
並第三而踐尊位深自矜負有謝異者頗知廢興梁
陳之際言無不驗江南人甚敬信之及陳主被執異
奔於璠由是益為衆所歸隋將宇文述以兵討之璠
遣王褒守吳州自將拒述述遣兵別道襲吳州褒棄
城走璠衆聞之悉無鬪志與述戰敗璠逃于太湖民

家執送述所斬於長安

皇甫績字功明安定人隋平陳自晉州刺史移蘄州開
皇十年江南高智慧作亂州民顧子元發兵應之因
以攻績相持八旬子元於冬至日遣人奉牛酒於績
績遺子元書曰曩者偽陳獨阻聲教江東士民困於
荼毒朝廷薄伐應時瓦解吳會臣民白骨還肉惟當
懷音感德豈宜自同吠主翻成反噬吾是隋將何容
外交易子析骸未能相告况足食足兵高城深塹坐

待強援綽有餘力何勞踵輕弊之俗作虛偽之辭以
此見期必不可得卿宜曉諭黎元能早改迷失道非
遠子元得書於城中頓首陳謝楊素援兵至合擊破
之十二年正月拜信州總管十二州諸軍事卒謚曰
安

劉權字世畧豐人少有俠氣重然諾藏亡匿死後折節
好學動循法度歷仕齊周入隋從平陳開皇十二年
拜蘓州刺史于時江南初平物情尚擾權撫以恩信

甚得民和官至南海太守

姑蘓志卷三十七